

– Me sa chuka li ka garavav man? Sa ka nashav li? Davka thagar halas mo ternipe. Me ka arakhav les i ka mudarav les! Me romes koryardzhas, man nashalkerdzhas, pe askeren bichhalela palal mande, me me romes na zhanava kate, nashti rodava les da. Me ka mudarav e thagaras, pale sora mo shoro da len.

Lakere manusha phenena:

– Ma thov to shoro ko gono! Ka chhinen, ka mudaren tut da, amen da! Ekhes nanay te muken zhivdo amender! Ov pe chhaves na dikhlas, ta tut li ka dikhel!?

– Sar ka del o Devel, chuka te ovel!

O thagar vechek irinela o diza, o gava pe askerentsa i kas sar arakhela romen salka tserentsa, chhinela, mudarela. E chhayoryakere manushen sa mudarela i khidela len pe avlinyate, ko palati, kula kerela atar shere lengere – tryanduenya shere thovdzhas ekh upral avereste i phenela:

– Do ekh shoro i ka achhon saranda shere ki kula, taman te bitinyarel pes zhi upre. Me chhaveskoro shoro trebe te ovel davka!

O raklo kato dikhela, kay leskoro dad chhindzhas, mudardzhas sare leskere romnyakere manushen, nashti arakhela pe romnya da, i zhala pe dadeskre palateste, ama o dad nashti pendzharela pe chhaves – o raklo shukilo, phurilo, uryavdo melale shehyentsa, sar rom ulo i vakerela pe dadeske:

– Mukh man te marav man ekhesa tire askerendar! Te marela man ov, le mo shoro i bitinyar i kula, ama ako marava les me, tu sora ka mares tut mantsa!

– Me tiro shoro na mangava! Me rodava me chhaves, leskoro shoro te lav, thay leskere romyakoro. Lengere sherentsa mangava te bitinyarav mi kula. Tiro shoro ka lav hem papale, isi vakuti tire shereske da.

I Gyulizara pale dimi kerdzhas pes sar mrush. Lel, tharel zifti, makhel pes te ovel kali sar arapi. Thovel peske duy voshta bare – ekh tele, ekh upre. Kato dikhela la manush, dar baro astarela les. Oy da kato ahavdzhas, kay o thagar chhingerdzhas lakere manushen, sar dilini uli. Bash kana gelo o raklo te anlashtinel pe dadesa i chhayori da uli othe. Garavela pes i uzharela te daldinel o thagar, ta lel i men leskiri, nay upral ki kula te thovel. I kato dikhela les othe kay anlashtinela e thagaresa, zankerela kay si leskoro manush, ya kay ka mudarel les anglal late. I oy nashtine te ikalel sora pi holi i akladinela anglal ko raklo, astarela te marel pes lesa. Ni ov zhanela kay si leskiri romni, ni pale oy pendzhardzhas pe romes. Marena pes but, duy-trin sahatcha i i chhayori pelarela e rakles